

95  
28. júní

## SAMÞYKKT

fyrir Vatnafélag Borgarhafnarhrepps.

### 1. gr.

Félagið heitir Vatnafélag Borgarhafnarhrepps. Heimili þess og varnarþing er Borgarhafnarhreppur í Austur-Skaftafellssýslu.

### 2. gr.

Verkefni félagsins er að vinna að því með fyrirhleðslum og öðrum mannvirkjum að varna Steinavötnum og Staðará að ganga á aðliggjandi jarðir að austan og vestan, og að veita þeim að væntanlegum brúarstæðum. Félagið getur aukið starfs svið sitt ef meiri hluti félagsmanna er því samþykktur.

### 3. gr.

Samþykkt þessi nær til jarðanna Kálfafells I, II og III, Breiðabólstaðar I, II, III og IV, er liggja að vatnasvæði Steinavatna og Leitis, Kálfafellsstaðar, Jaðars, Brunnavalla og Brunna, er fyrir ágangi verða ýmist eða bæði af Steinavötnum og Staðará. Nú þykir nauðsynlegt eða réttmætt að bæta við félagsskapinn nýrri jörð eða fella jörð úr félagsskapnum, en nétt ekki samþykki aðalfundar, og er þá heimilt að skjóta því atriði til úrskurðar atvinnuáráðherra, sbr. 76. gr. vatnalaganna.

### 4. gr.

Stjórn félagsins skipa 3 menn og aðrir 3 í varastjórn, er kosnir skulu til þriggja ára í senn, og gengur einn úr á ári eftir hlutkesti fyrstu 2 árin. Stjórnin velur sér formann og skiptir með sér verkum.

Á aðalfundi skal kjósa 2 menn til að endurskoða reikninga félagsins.

### 5. gr.

Aðalfund félagsins skal halda fyrir lok nóvembermánaðar ár hvert. Skal þar framlagður endurskoðaður reikningur þess fyrir umliðið ár. Fundur er lögmætur, ef helmingur félagsmanna er mættur. Til samþykktar á félagsmálum þarf einfaldan meiri hluta mætttra atkvæða, en til breytinga á samþykkt þessari þarf  $\frac{2}{3}$  hluta mætttra atkvæða. Heimilt er stjórninni að kveðja til aukafundar, ef þörf krefur, en skylt, ef  $\frac{1}{4}$  félagsmanna óskar þess. Atkvæðisrétt um félagsmál hafa eigendur og ábúendur framangreindra jarða og gildir eitt atkvæði fyrir hverja landeign.

Til aðalfundar skal boða með viku fyrirvara á þann hátt, sem venja er að boða til sveitarfunda. Í fundarboði skal getið dagskrár fundarins. Formaður kveður til stjórnarfunda svo oft sem honum þykir þurfa, svo og ef einhver meðstjórnandi óskar þess. Skylt er stjórninni að halda gerðabók. Þar skal rita fundargerðir félagsfunda.

### 6. gr.

Kostnaði við viðhald og umbætur varnargarða þeirra og annarra mannvirkja, sem gerð verða, skal félagsstjórnin jafna á hlutaðeigandi jarðeignir í réttu hlutfalli við fasteignamat á landi jarðanna og einnig eftir hagsbótum þeim, er hver jörð hefur af fyrirhleðslunni, eftir mati 3 manna, er félagið kýs til þess. Eftir sama hlutfalli skal skipta öðrum árlegum kostnaði. Verði ágreiningur um skipting kostnaðar, ber að leggja hann undir úrskurð þar til dómkvaddra manna, og að öðru leyti fer um hann eftir gildandi lögum. Nú þykir nauðsynlegt að gera ný mannvirki til varnar vatnaágangi, og skal þá jafna kostnaði á félagsmenn á sama hátt, að frádregnum þeim hluta hans, sem kann að fást greiddur annars staðar að.

## 7. gr.

95

Formaður félagsstjórnar hefur á hendi umsjón með mannvirkjum þeim, sem gerð verða. Hann skal og halda alla reikninga félagsins og annast greiðslur. Skal hann í samráði við meðstjórnendur sína annast um að gert verði við bilanir svo fljótt, sem auðið er, svo fyrirhleðslan sé jafnan sem tryggust. Skoðun á mannvirkjum þeim, sem gerð hafa verið, skal jafnan fara fram árlega af þar til hæfum manni, að tilhlutun formanns og skal hann senda afrit af skoðunargerðinni til ráðunauts ríkisstjórnarinnar í vatnamálum (vegamálastjóra). Félagsmenn skulu ávallt að öðru jöfnu sitja fyrir öðrum um vinnu á vegum félagsins fyrir verkamenn, hesta, bifreiðar og önnur vinnutæki.

## 8. gr.

Allan sameiginlegan kostnað skal félagsstjórnin innheimta með nægjanlegum fyrirvara. Ef tregða verður á með greiðslur, er heimilt að taka gjöldin lögtaki. Til þess að standa í skilum með árlegar greiðslur kostnaðar er stjórninni heimilt að taka bráðabirgðalán, sem jafnan greiðist að fullu á sama reikningsári með niðurjöfnuðum gjöldum félagsmanna. Vexti af slíku láni má telja með öðrum kostnaði. Reikningsár félagsins er almanaksárið.

## 9. gr.

Nú telur atvinnumálaráðherra eftir tillögum ráðunauts ríkisstjórnarinnar í vatnamálum, að nauðsyn sé til umbóta á varnargörðum eða nýrra mannvirkja frekar en félagsstjórn hefur áformað og skal þá félagsstjórn skylt, er hún hefur fengið tilkynningu þar um, að láta framkvæma þau verk svo fljótt, sem nauðsyn krefur, ef ástæður leyfa og fé er fyrir hendi.

## 10. gr.

Nú þykir ráðlegt eða nauðsynlegt að slíta félagsskapnum og fer þá um tillögur þar að lútandi sem um tillögur til breytinga á samþykkt þessari, sbr. 4. gr., enda staðfesti atvinnumálaráðherra samþykkt um félagsslitin.

## 11. gr.

Brot gegn samþykkt þessari skal varða allt að kr. 1500.00 sektum, er renna í félagssjóð.

## 12. gr.

Með mál út af brotum á samþykkt þessari skal farið að hætti opinberra mála.

Samþykkt þessi staðfestist hér með samkvæmt vatnalögum, nr. 15 20. júní 1923, til þess að öðlast gildi þegar í stað.

*Atvinnumálaráðuneytið, 28. júní 1955.*

**Steingrímur Steinþórsson.**

*Þorv. K. Þorsteinsson.*